

西溪叢語二

涵芬樓
第八集

西溪叢語卷下

宋剡川姚寬撰

孟子言去齊接淅而行淅漬米也接字殊無理許慎說文引孟子去齊境淅而行境音其兩切漣乾漬米言不待炊而行也異聞集李吉甫銘曰孟子去齊而境淅唐本作境字

王介甫云俟我於城隅言靜女之俟我以禮也其美外發其和中出其節不可亂者彤管也貽我彤管言靜女之貽我以樂也徐安道注音辯云彤赤漆也管謂笙簫之屬按靜女詩貽我彤管彤管有煇注云煇赤貌彤管

以赤心正人箋云彤管赤管也疏必以赤者欲使女史以赤心正人謂赤心事夫人正妃妾之次序也鄭注古者后夫人必有女史彤管之法史不記過其罪殺之後漢皇后妃序云頒官分務各有典司女史彤管記功書過左氏傳定公九年靜女之三章取彤管焉杜預云詩邶風也言靜女三章之詩雖說美女義在彤管彤管赤筆女史記事規誨之所執以此攷之不聞謂之樂也

陶潛讀山海經十三首用事今本多差誤各爲注釋之第一篇泛覽周王傳乃周穆天子傳荀勗校定本是也流觀山海圖乃山海經十八卷郭璞注本是也第二篇

云玉堂凌霞秀王母怡妙顏天地共俱生不知幾何年
靈化無窮已館宇非一山高酣發新謠寧效俗中言西
山經云西玉山是王母所居其狀如人豹尾虎齒而善
嘯蓬頭戴勝是司天之屬主五殘大荒南經云西海之
南流沙之濱赤水之後黑水之前有大山名曰崑崙之
丘有人戴勝虎齒有尾火處名曰西王母又云大荒之
中有山名豐沮玉門西有王母之山又云以崑崙爲宮
亦有離宮別窟郭璞云不專住一山也穆天子傳云吉
曰甲子天子賓于西王母執玄珪白璧以見西王母于
瑤池之上又天子升於崦嵫山即西王母之山也弁山即

弇磁山也西王母宴穆王於瑤池之上王母爲天子誼
曰白雲在天山陵自出道里悠遠山川間之將子無死
尚能復來與穆徃復數詩不具載第三篇云迢遞槐江
嶺是謂玄圃丘西南望崑墟光氣難與儔亭亭明玕照
落落清瑤流恨不及周穆託乘一來遊槐江之山丘時
之水出焉其陽多丹粟其陰多采黃金銀惟帝之平圃
郭璞註云即縣圃也南望崑崙其光熊熊其氣魂魂其
上多藏卿玕爰有淫水其清洛洛淫音遙穆天子傳天
子銘跡於玄圃之上第四篇云丹木生何許迺在崑山
陽黃花復朱實食之壽命長白玉凝素液瑾瑜發奇光

豈伊君子寶見重我軒黃西山經云西北四百二十里
田峯山音密其上多丹木圓葉而赤莖黃花而赤實其
味如飴食之不飢丹水出焉西流注于稷澤其中多白
玉是有玉膏其源沸沸湯湯黃帝是食是饗是生玄玉
玉膏所出以灌丹水五色乃清第五篇云翩翩三青鳥
毛色竒可憐朝爲王母使暮歸三危山我欲因此鳥且
向王母言在世無所須惟酒與長年三危之山三青鳥
居是山廣圓百里青鳥主爲西王母取食竹書云穆王
西征至青鳥所解又拒巫之山一曰龜山西王母梯航
而戴勝杖其南有三青鳥爲西王母取食又言三足鳥

主給使也第六篇云逍遙蕪臯上杳然望扶木洪柯百
萬尋森散覆暘谷靈人侍丹池朝朝爲日浴神景一登
天何幽不見燭黑齒國人黑手食稻使蛇其一蛇赤下
有暘谷上有扶木即扶桑木十日所浴在黑齒北居水
中有大木九日居下枝一日居上枝第七篇云粲粲三
珠樹寄生赤水陰亭亭凌風桂八榦共成林雲鳳撫雲
舞神鸞調玉音雖非世上寶爰得王母心謹未國在赤
水之陰有三珠樹如栢葉皆爲珠其樹若彗海內南經
桂林八樹在賁隅東八樹而成林言其大也丹穴之山
有鳥焉其狀如鶴五采而文乃鳳也自歌自舞女牀之

山有鳥其狀如翟而五采文名曰鸞自歌見則天下康
寧第八篇云自古皆有沒何人得靈長不死復不老萬
歲如平常赤泉給我飲員丘足我糧方與三辰游壽考
豈渠央列子云北海之北其國名曰終北四方悉平周
以喬陟當國之中有山山名壺領狀若甌甌頂有口狀
若圓環名曰滋穴有水湧出名曰神漢臭過椒蘭味過
醪醴一源分爲四埒注於山下經營一國亡不悉徧土
氣和亡扎厲不夭不病人倦則飲神漢周穆王北遊過
其國三年忘歸今赤泉山海經無之知古文缺失也第
九篇云夸父誕宏志乃與日競走俱至虞淵下似若無

勝負神力既殊妙傾河焉足有餘跡寄鄧林功竟在身
後海外北經云夸父與日逐走渴欲飲於河渭不足飲
大澤未至道渴而死棄其杖化爲鄧林又云夸父不量
力欲追日景逮之暘谷郭璞云隅淵也今作虞淵第十
篇云精衛銜微石將以填滄海形天一本作舞干戚猛
志故常在同物既無慮化去不復悔徒設在昔心良辰
詎可待發鳩之山有鳥焉其狀如鳥而文首白喙名曰
精衛其鳴自詒是炎帝之少女名曰女娃遊于東海溺
而不反故爲精衛常銜西山之木石以堙東海竒肱之
國形天與帝爭神帝斷其首葬之常羊之山乃以乳爲

目以臍爲口操干戚以舞第十一篇云巨猾肆威暴欽
鵠遠帝旨窳窳強能變祖江遂獨死明明上天鑒爲惡
不可履長枯固邑劇鵠鶚豈足恃鍾山神其子曰鼓其
狀人面而龍耳是爲欽鵠殺葆江于崑崙之陽葆江即
祖江也帝乃戮之鍾山之東曰嵯岸鵠音下邳之邳瑤
音遙曰巨猾肆威暴者謂欽鵠殺祖江二負臣殺窳窳
也猾作危字非是欽鵠化爲大鶚亦爲鵠鳥鶚音諤鵠
音俊或云鵠鵠字非也窳窳者蛇身人面爲二負臣所
殺開明東有巫夾窳窳之尸皆操不死之藥以拒之窳
窳變爲龍首居弱水中食人音軋俞第十二篇鵠鵠見

城邑其國有放士念彼懷王世當時數來止青丘有奇
鳥自言獨見爾本爲迷者生不以喻君子拒山西臨黃
北望諸毗東望長右有鳥焉其狀如鴟而人手其音如
痺其名曰鵯其鳴自號見則其國有放士放逐也懷王
之世謂屈原也青丘國有奇鳥不詳其狀鴟鵯或爲鵯
鵯或爲鳴鵯皆非也第十三篇云巖巖顯朝市帝者慎
用才何以廢共鯀重華爲之來仲文獻誠言薑公乃見
猜臨沒告饑渴當復何及哉竹書紀年堯欲禪舜共工
鯀諫以爲不可舜即位殛鯀于羽山流共工於幽州海
內經云鯀竊帝之息壤以堙洪水不待帝命帝令祝融

殺鯀于羽郊神異經云西北荒有人人面朱髯蛇身人
手四足食五穀禽獸頑愚名曰共工東方有人焉人形
而身多毛自解水土志加通塞爲人自用欲爲欲息名
曰鯀下云仲文薑公未詳

柳子厚詩云空齋不語坐高春薛能詩云隔江遙見夕
陽春或云見春米大非也淮南子云日至于虞淵是謂
高春注云虞淵地名高春時始戍民碓春時也至于連
石是謂下春注云連石西山名言將暝下民悉春故曰
下春

古樂府陸瑜有僊人覽六著篇九僊歡會賞六著且娛

神戲石聞餘地銘山憶舊秦避敵情思巧論兵勢重新
問取南皮夕還笑拂棋人初不曉何戲西京雜記云許
博昌安陵人善陸博竇晏好之嘗與居處法用六著或
謂之究以竹爲之長六分王逸解楚辭云投六著行六
棊故爲六博以篋篋作箸象牙爲棋麗而且好也說文
云六箸十二棋也

鮑昭行藥至城東橋詩五臣注云昭因疾服藥行而宣
導之杜甫舟中伏枕詩云行藥病泠泠漢許皇后云我
頭岑岑藥中得無有毒乎

金虎二字所用不同張平子東京賦云周姬之末政用

多僻始於宮隣卒於金虎五臣注云幽厲用小人與君子爲隣堅若金惡若虎卒以此亡何敬祖詩云望舒離金虎五臣注云望舒月御也西方金也西方七宿畢昴之屬俱白虎也河圖云亡金虎喻秦居也陸士衡詩云大辰匿曜金虎習質甘石星經云昴西方白虎之宿太白金之精太白入昴金虎相薄主有兵亂

沈存中筆談云馬融笛賦云裁以當適使易持李善注適馬策也裁笛以當馬適故使易持此繆說也笛安可以爲馬策適管也古文謂樂之管爲適故潘岳笙賦云修適內闢餘簫外威裁以當適者餘品多裁衆適以成

音此笛但裁一適五音皆具當適之工不假繁猥所以
便而易持也據說文適槲並音張瓜反箒也不聞以適
爲樂管潘岳笙賦乃用槲字云脩槲內闢注云修長槲
大闢開也自與適字不同言羗人裁之以當馬策言易
執持而復可吹也牽強爲說殊無義理

汝南陳敬伯路逢歸忌必反郵亭後坐誅無禁忌者多
談爲繆注云四孟在壬四仲在寅四季在子今隱陽書
云辰戌丑未日子日寅申巳亥月丑日子午卯酉月寅
日與舊法不同故不足信也

杜甫送高三十書記云觸熱向武威程曉三伏詩云今

世櫛櫛子觸熱到人家據炙轂子云櫛櫛笠子也集韻
櫛音柰櫛音戴二字不曉事也

望江南者朱崖李太尉鎮關西日爲亡姬謝秋娘所作
後進入教坊

和凝嘗以宰輔自期登第之日名在第十三後覽范質
文尤加賞歎即以第十三處之場屋間謂之傳衣鉢若
禪宗之相傳授其後質果繼凝登相位亦爲太子太傅
魯國公縉紳以爲美談後馮當世知貢舉擢彭器資爲
首後贈彭詩云當時已自傳衣鉢羞媿猶爲食肉僧謂
此也

天聖初竇貞固知貢舉舊制夜試以三燭爲限長興二年改令晝試貞固以短景難成文不盡意失取士之道奏復夜試

孫天舉云嘗見吳天用家藏一易書不知何人作云乾坤毀則無以見易乾坤有毀時故終之以未濟蓋乾坤毀則有水火之災水之災多在東南火之災多在西北故西北多山東南多水東南之山皆水衝激而成有連亘三四十山不絕者乃地脉也後兵火失其書亦不能盡記其說

盧思道挽詩獨八首比時人最盛時謂之八米盧郎八